



Igl cunsiglier guvernativ Jon Domenic Parolini e Chantal Marti, la manadra digl uffezi da scola, on visito gievgia avantmezde la scola a Lantsch.

FOTO USS

## «Igl ambiaint è rumantsch»

Visitar scolas ainten differentas regiuns cun differentas situaziuns e sfeidas: Igl cunsiglier guvernativ Jon Domenic Parolini è an gir. Gievgia passada è el sa farmo ainten la Val Alvra, a Lantsch e Casti. El turna cun «en bung sentimaint» a Coira, è pero cunsciaint, tgi gist la situaziun da lungatgs è fitg cumplitgeida.

SANDRA BALZER/FMR

«La Val Alvra è fitg speziala», dei Jon Domenic Parolini tschantond alla gronda meisa ainten stanza da scolasts a Casti. Igl cunsiglier guvernativ e responsabel pigl departamaint d'educaziun, cultura e protecziun digl ambiaint digl Grischun è an gir. Igl è en gir da scola tar scola ainten las differentas regiuns digl cantun Grischun. E gievgia passada è el sa farmo an Val Alvra, ò visito la scoletta e scola primara a Lantsch ed igl scalem superieur a Casti. «Ansem cun la manadra digl Uffezi per la scola populara ed igl sport – Chantal Marti – less ia visitar differentas regiuns digl cantun cun differentas situaziuns, linguisticas pero er cun differentas sfeidas.»

### Differentas sfeidas

Per survagheir en'invista tge tgi pertotga sfeidas, gist er linguisticas, èn las scolas da Lantsch e Casti ena buna tscherna: «Igl n'è betg simpel da manar ena scola ainten ena regiun perifera, noua tgi ples cumegn politics èn participos, seia chegl cun l'organisaziun da transports, meisa da mezde ed integraziun dad unfants da differentes lungatgs e cun differentes basigns», dei Jon Domenic Parolini.

### 15,2% rumantsch

Ena situaziun linguistica fitg multifara sa preschainta ainten la scoletta e scola primara a Lantsch: 64,7% tudestg, 15,2% rumantsch, 8,2% portughes, 4,7% taliang, 2,4% ucranes, 1,2% ulteriours lungatgs. Uscheia la repartiziun tenor statistica dalla scola digl lungatgs maters digl 85 unfants – chegl ainten ena scola digl totfatg rumantscha. En svilup, a disfavur digl rumantsch ed ena realitad, da la quala er Jon Domenic Parolini è cunsciaint:

«Gist a Lantsch sa domicilieschan veapi duple persungas da lungatg tudestg. An cumbinaziun cun las fracziuns cun duple substanza rumantscha scu per exaimpel Mon ni Stierva dat chegl tot an tot ena masdada tg'ins pò manar tuttegn ena scola rumantscha ainten chel li, pero igl è ena gronda sfeida.»

El rancanoscha la gronda premura dalla magistraglia e digl manaders da scola. «Nous vagn pero er santia, tg'igls genitours on tgapientscha per continuar cun l'instrucziun rumantscha, veian chegl perfign scu avantatg sch'igls unfants amprenan en lungatg vetiers.» Cun visitar tot igls scalems, dalla scoletta anfignen la 6avla classa vegia el pudia sa persvader tg'igls unfants amprenan aint igl decurs digl onns rumantsch e tgi vignan integros pass per pass graztga la consequenza dalla magistraglia. «Nous vagn via, igl ambiaint è rumantsch, e chegl ò fatg bagn, igl è pero ena gronda lavour.»

### La lescha da lungatgs è decisiva

La realitad resta pero tar 15,2% digl unfants tgi von a scola a Lantsch tg'èn anc da lungatg rumantsch. Anfignen a tge punct sa lascha anc giustifitgier ena scola rumantscha? Igl cunsiglier guvernativ accentuescha: «Nous vagn ena lescha da lungatgs cantunala e chella dei cler e net, schi ena vischnanca è rumantscha è chegl lungatg uffizial er lungatg da scola. En fatg, tgi na so er betg neir mido d'ena radunanza communal.» Igl manader da scola regiunal Damian Dosch agiunta: «La lescha da lungatgs prescreiva, tgi schi duple tgi 40% digl pievel – e betg digl scolars – è da lungatg rumantsch alloura vign instrua rumantsch. E schi dei ins fò chegl er. Er schi chegl monta tgi seia necessari bleras resursas ed investiziuns aint igl lungatg.»

Er igl inspectour da scola responsabel, Jachen Andri Buchi ò accompagna la viseta ainten Val Alvra. El vei l'experiencescha tg'ins ò fatg a Lantsch cun situaziuns difficilas scu potenzial: «Lantsch ò siva dad onns ena situaziun speziala cugl lungatgs, er cun unfants da lungatg ester. Chellas experienceschas tg'ins fò sur onns dat ena tscherta qualitat alla scola. Igl è er da menziunar tgi la cefra da scolaras e scolars è a Lantsch siva dad onns constanta, per blers lis perifers è chegl la sfeida.»

### «La dretga veia per regiuns periferas»

Siva d'aveir passanto igl avantmezde a Lantsch ed igl sivamezde a Casti, von Chantal Marti e Jon Domenic Parolini tenor atgnas explicaziuns cun en «bung sentimaint» puspe vers Coira: «I funcziuna bagn, i dat blers magisters tg'èn fitg motivos da dar scola, tgi s'occupeschan digl unfants. Zont impressiun ò fatg da vaseir scu tg'igls unfants amprenan ainten scoletta rumantsch e scu tgi son siva ainten la 6avla classa rumantsch», dei Chantal Marti. Ella nomna er las structures digl de, per exaimpel la meisa da mezde tgi vign purscheida a Lantsch e Casti: «Chegl è fitg impurtant e tenor me la veia tgi regiuns periferas ston eir schi vottan catter nova gliout tgi vign a star ainten la regiun.» Igl cunsiglier guvernativ accentuescha las explicaziuns dalla manadra digl uffezi: «I vign fatg buna lavour, chegl è mia impressiun ed ins peglia per mangs las sfeidas ainten ena regiun perifera, cun ena situaziun da lungatg tg'è fitg cumplitgeida.»

Jon Domenic Parolini tradescha tg'igl sies gir igl magna aint igl decurs digl semester anc ainten la Bergiaglia. «Siva vurdainsa anavanc, pass per pass. Ia va anc quatter onns peda per visitar las scolas», dei igl cunsiglier guvernativ cun en reir.



Damian Dosch (magnascola), Chantal Marti (manadra uffezi da scola), Jon Domenic Parolini (cunsiglier guvernativ) e Jachen Andri Buchli (inspectour da scola).

FOTO SANDRA BALZER



Observan l'instrucziun da scola a Casti: (da san.) Damian Dosch, Jachen Andri Buchli, Chantal Marti e Jon Domenic Parolini.

FOTO SANDRA BALZER